

# UNISSA - lima IPT Antarabangsa meterai MoU



REKTOR UNISSA, Dr. Awang Haji Norarfan bin Haji Zainal menandatangani MoU di antara UNISSA dan Universitas Islam Negeri Sunan Kalijaga, Jogjakarta, Indonesia.

**JERUDONG, Rabu, 13 Disember.** - Universiti Islam Sultan Sharif Ali (UNISSA) memperluaskan lagi jaringan rakan strategik serantau dengan penandatanganan Memorandum Persefahaman (MoU) bersama lima Institut Pengajian Tinggi (IPT) Antarabangsa yang berlangsung di Royal Berkshire, Jerudong Park and Polo Country Club, di sini.

Penandatanganan dimeterai semasa UNISSA menjadi tuan rumah dan penganjur utama pada Persidangan Antarabangsa Kewangan Islam Universiti-universiti ASEAN Ke-5 (5th AICIF) yang melibatkan kerjasama di antara UNISSA dengan Mindanao State University, Filipina; Trisakti

University, Indonesia dan Universitas Islam Negeri Sunan Kalijaga, Jogjakarta yang ditandatangani oleh Rektor UNISSA, Dr. Awang Haji Norarfan bin Haji Zainal.

Menandatangani mewakili pengajian luar negara ialah Vice Chancellor for Administration and Finance dari Mindanao State University, Filipina, Attorney Saaduddin Alauya Junior. Sementara itu, Trisakti University, Indonesia diwakili oleh Secretary Program Magister Economics in Islamic Economic and Finance, Dr. Eleonora Sofilda dan Universitas

Islam Negeri Sunan Kalijaga, Jogjakarta pula diwakili oleh Dean's Representative, Dr. Haji Shobiyullah.

Sementara itu, majlis turut menyaksikan penandatanganan MoU di antara UNISSA dengan Islamic Banking and Finance Institute of Malaysia (IBFIM) dan Amanah Institute of Islamic Finance and Economics (IIFE), yang mana UNISSA diwakili oleh Dekan Fakulti Ekonomi dan Kewangan Islam, UNISSA, Dr. Awang Abdul Nasir bin Haji Abdul Rani.

Manakala menandatangani bagi pihak IBFIM ialah Ketua Pegawai Eksekutif, Yusry Yusoff dan mewakili Amanah IIFE, Germany ialah Ketua Pegawai Eksekutif institut berkenaan, Dr. Muhammad Ashfaq.

Penandatanganan MoU tersebut adalah sebagai usaha UNISSA untuk membarigakan lagi pada dunia luar tentang peranan universiti Islam yang unggul di negara ini dalam memperkembangkan bidang ilmu pengetahuan agama Islam selaras dengan dunia global.

Dengan termeterainya penandatanganan MoU tersebut, UNISSA akan dapat mempergiatkan program kerjasama strategik melalui pertukaran pelajar dan tenaga akademik serta dapat membuat penyelidikan di antara kedua-dua belah pihak.



REKTOR UNISSA, Dr. Awang Haji Norarfan menyaksikan majlis penandatanganan MoU di antara Fakulti Ekonomi dan Kewangan Islam, UNISSA dan Islamic Banking and Finance Institute of Malaysia (IBFIM) (kiri). Sementara gambar kanan majlis penandatanganan MoU di antara Fakulti Ekonomi dan Kewangan Islam, UNISSA dan Amanah Institute of Islamic Finance and Economics, Germany.



## 28 peserta SSEAYP Ke-44 selamat pulang



PEMANGKU Pengarah Pembangunan Belia dan Sukan, Kementerian Kebudayaan, Belia dan Sukan, Dayang Zainab binti Haji Morshidi semasa hadir mengalu-alukan ketibaan para peserta SSEAYP di Lapangan Terbang Antarabangsa Brunei (LTAB).



AWANG Mohd. Ihsan Sabri @ Zayn Sabri bin Abdul Manaf.



DAYANG Aida Amalin binti Muhd. Aimanuddin.

Berita dan Foto : Ak. Syi'aruddin Pg. Dauddin

**BANDAR SERI BEGAWAN, Rabu, 13 Disember.** - Seramai 28 peserta yang menyertai Rancangan Kapal Belia Asia Tenggara dan Jepun (SSEAYP) Ke-44 bermula 23 Oktober yang lalu selamat pulang malam ini.

Hadir mengalu-alukan ketibaan para peserta SSEAYP di Lapangan Terbang Antarabangsa Brunei (LTAB) ialah Pemangku Pengarah Pembangunan Belia dan Sukan, Kementerian Kebudayaan, Belia dan Sukan, Dayang Zainab binti Haji Morshidi.

Program yang berlangsung selama 52 hari bermula dari Tokyo, Jepun tersebut belayar

menggunakan Kapal Nippon Maru menuju Sihanoukville, Kemboja; Bangkok, Thailand; Jakarta, Indonesia; Kuala Lumpur, Malaysia dan berakhir di Tokyo, Jepun.

Ketua-ketua belia negara peserta juga berkesempatan melawat negara Laos semasa program berada di Thailand dengan menggunakan penerbangan.

SSEAYP merupakan program pertukaran belia antarabangsa khusus bagi negara ASEAN dan Jepun, bermula 1974 dengan tujuan untuk melahirkan kefahaman dan kerjasama antarabangsa dalam kalangan

belia-belia terlibat, di samping mempelajari adat budaya, politik dan pembangunan ekonomi sesebuah negara.

Awang Mohd. Ihsan Sabri @ Zayn Sabri bin Abdul Manaf selaku Ketua Kontinjen Negara ketika ditemu bual menjelaskan, ia merupakan kali pertama belia menyertai SSEAYP, di mana program tersebut memberikan pengalaman terutama dalam pertukaran budaya dan maklumat.

Sementara itu, Dayang Aida Amalin binti Muhd. Aimanuddin pula berkata, SSEAYP memberikan pengalaman yang berharga terutama dalam mengadakan perbincangan secara berkumpulan mengenai media, pendidikan dan sebagainya, selain dapat berkomunikasi dengan rakan-rakan SSEAYP yang lain.